



**Ikapitong Domingo sa
Kasarangang Panahon
Pebrero 23, 2014**

RITO SA PAGSUGOD

P: Sa ngalan sa Amahan ug sa Anak
ug sa Espiritu Santo.

K: *Amen.*

P: Ang Ginoo maanaa kaninyo.

K: *Ug maanaa usab kanimo.*

Pasiuna ug Pag-abi-abi

P: Mga minahal kong mga kahigalaan:
Karon, mapasalamaton kitang
magsaulog sa tawag sa Dios kanato
sa pagkabalaan. Ang pagkabalaan,

Ma-Dominggong Tamdanang Liturhikal alang sa Simbahan sa Kabus sa Diwa sa Bag-ong Ebanghelisasyon

Ang Simbahan sa Kabus,
Apinaagi sa mga Gagmayng
Simbahanong Katilingban,
gibalaan sa mga subersibong buhat
sa gugma nga walay utlanan.

Dugang pa, sa iyang padayong
pagpamalandong bahin sa
kalambigitan sa Simbahan sa Kabus
ug sa mga Gagmayng Simbahanong
Katilingban, ang PKP-II mihulagway
sa GSK sa maingon: (140) Sa
daghang mga diyosesis karon ang
Gagmayng Simbahanong Katilingban
ang nahimong nag-unang buluhatong
pastoral. Bisan tuod daghan ang
mga porma sa gagmayng katilingban
sa pagtoo karon, ang Gagmayng
Simbahanong Katilingban mao
ang dayag nga tilimad-ong dagway
sa sinimbahang pagbag-o. Ang
kakusog sa ilang pagdaghan dinhi
sa nagkalainlaing bahin sa Pilipinas
maoy usa ka maayong timaan sa
buhing pagdagsang sa mga gasang
gituga sa Dios ngadto sa mga
kabus. Ang ilang katakus alang sa
ebanghelisasyon naghatag ug dakong
paglaum sa Simbahan sa Pilipinas.

Matud pa ni P. Amado Picardal,
CSsR, mahitungod sa Nasudnong
Hulagway sa GSK kaniadtong 7
sa Septyembre 2013, ang tinubuan
sa mga GSK sa Luzon dasig kayo,
ang sa Kabisayaan nagtubo u gang
sa Mindanao daw mingkubol.
Iya pa gyung gilarawan ang mga
nagkadaiyang ang-ang sa ilang
pagtubo isip lahi-lahi ug wala
magkatupong, apan dili kini sabton
nga usa ka paghukom mahitungod
sa kalidad ug bili sa tinubuang
nakab-ot sa usa ka partikular nga
GSK. Ang matag usa adunay iyang
kaugalingong dagan.

Makaayo gyud kaayo kon inyong
pamalandongan ang partikular nga
ang-ang sa kalamboan sa inyong
GSK sa diwa sa Simbahan sa Kabus
ug sa tawag sa pagbag-o. Sa unsa
mang paagiha nga mabag-o pa gyud
mo ug dugang aron molambo pa
kamo isip GSK ug matuman ninyo
ang pagka-Simbahan, Simbahan sa
Kabus? ■

sumala sa bibliya, mao ang paghiusa ug dili pagbulag sa gugma ngadto sa Dios ug ang pag-alagad sa katawhan. Buot ipasabot niini mao ang pagtukod ug katilingban alirong kang Jesus nga nahigugma kanato nga walay kondisyon. Buot ipasabot niini mao ang pagka-katilingban nga mobalintuwang sa mga kasagarang batasan sa panimalos ug kabangis dapig sa kaaghop ug pagpakig-uban alang sa kalingkawasan.

Akto sa Paghinulsol

P: Mga igsoon, moduol kita sa Dios karon alang sa iyang tabang nga makaluwas ug pasaylo, kay ang atong Dios Ginoo man sa gugma ug kaaghop.
K: *Amen.*

P: Gipadala ikaw aron pag-ayo sa mga mahinulsolon, Ginoo, kaloy-i kami.
K: *Ginoo, kaloy-i kami.*

P: Gitawag mo ang mga makasasala, Kristo, kaloy-i kami.
K: *Kristo, kaloy-i kami.*

P: Nagalingkod ka sa too sa Amahan aron pag-ampo alang kanamo, Ginoo, kaloy-i kami.
K: *Ginoo, kaloy-i kami.*

P: Kaloy-an unta kita sa Dios...ngadto sa kinabuhing dayon.
K: *Amen.*

Himaya sa Dios didto sa langit...

Kolekta

P: Mag-ampo kita: Itugot, nangaliyopo kami, Labawng Makagagahum nga Dios, nga, pinaagi sa among makanunayong pagpamalandong sa mga butang espirituhanon, mahimo unta namo sa pulong ug sa buhat ang mga makapahimuot kanimo. Pinaagi sa among Ginoong Jesukristo Imong Anak, nga buhi ug hari uban Kanimo diha sa kahiusahan sa Espiritu *Santo*,

Dios nga usa, hangtud sa kahangturan.
K: *Amen.*

LITURHIYA NG SALITA

Unang Pagbasa: Lev 19,1-2.17-18

L: Ang pagbasa gikan sa basahon ni Leviticus... (*Pagabasahon gikan sa Kasulatan*)

L: Ang pulong sa Ginoo.

K: *Salamat sa Dios.*

Komentaryo sa Lev 19,1-2.17-18:

Usa kini ka uyukang mensahe sa Kodigo sa Pagkabalaan: ang pagdani sa pagkabalaan tungod kay “Ako nga inyong Dios balaan” gisundan gilayon ug mga pamaagi kon unsaon pagtuman sa mga sugo sa pag-ampo ug pagtoo nga dili gayon mahibulag apan ghiusa sa pagtuman sa mga tulumanong katilingbanon ug moral. Busa, dili kita makasimba sa Dios kong dili kita mahigugma ug moalagad sa atong silingan, sa atong isigka-lumulupyong, sa mga dumuduong ug sa tanang binuhat. Kining ilang hingpit ug tiunay nga pagkahiusa mao ang hingpit ug tiunay nga pagka-santos!

Salmo Responsoryo: Sal 103,1-2.3-4.8.10.12-13

Tugon: Maluluy-on ug maayo ang Ginoo.

L: Dayega ang Ginoo, kalag ko! Sakinauyokan dayega ang balaan niyangngalan! Dayega ang Ginoo, O kalag ko! Ayawg kalimti ang iyang kamaluluy-on.

T: Maluluy-on ug maayo ang Ginoo.

L: Gipasaylo niya ang tanan kongkasal-anan, ug giayo ang tanang bala-tian. Giluwas niya ang akong kinabuhisa kaalaot; ug gipurongpurongan ko sagugma ug kaluoy.

T: Maluluy-on ug maayo ang Ginoo.

2 L: Maluluy-on ug maayo ang Ginoo;

hupong sa gugma ug dugayng masuko. Motagad siya dili bugti sa atongkasalanan, ni sa angay nato iya tang silotan.

T: *Maluluy-on ug maayo ang Ginoo.*

L: Sama nga ang silangan layo kaayo sa kasadpan, ingon pod siya kalayo sa kasalanan sa katawhan. Ingon nga maluoy ang amahan sa kabataan, ang Ginoo sab maluoy sa nataha kaniya.

T: *Maluluy-on ug maayo ang Ginoo.*

Komentaryo sa Sal 103:

Usa kini ka awit sa pagpasalamat tungod sa mga hiyas sa kaaghop ug kamaloloy-on sa Dios. Ang hinungdan sa panalangin ug pasalamat mao ang mga buhat sa pagpasaylo, pag-ayo ug pagluwas sa Ginoo. Mga bunga kini sa iyang kaaghop ug kalomo nga natagamtam sa salmista. Sa iyang pag-ila sa mga konkretong buhat sa Ginoo nganha sa iyang kinabuhi, ang salmista nakasulod sa persona sa Ginoo: dugayng masuko, abunda sa kaaghop ug nakiglambigit kanato pinasikad sa iyang kalooy, ug dili tungod sa atong tawhanong kahuyang ni pagkamakasasala. Ang pasaylo sa Ginoo naghambin ug kosmikong dimensyon (ang silangan ug ang kasadpan), ug labaw pa kay sa tawhanong mga kasinatian sa amahanong kalomo.

Ikaduhang Pagbasa: 1 Kor 3,16-23

L: Ang pagbasa gikan sa unang sulat ni Apostol San Pablo sa mga taga-Korinto... (*Pagabasahon gikan sa Kasulatan*)

L: Ang pulong sa Ginoo.

K: *Salamat sa Dios.*

Komentaryo sa 1 Kor 3,16-23:

Human maplastar ang mga batakang prinsipyo sa Kristohanong pagpuyo, giatubang gilayon ni Pablo and prinsipal nga mga suliran sa

katilingban: ang pang-inindigay ug pagkabahinbahin sa katilingban.

Niining bahina, iyang gihatag kanato ang mas halawom nga hinungdan sa panaghiusa: kamo mga templo sa Ginoo, ug ang Espiritu nabuhi sa inyong kahiladman. Busa, mga santos na kamo. Wala kamo tawga aron alagaran ang inyong mga pangulo ug ang mga nag-organisa kaninyo. Inyo sila: sila inyong mga ministro, ug mga sulugoon sa Ginoo. Dili ninyo angayan alagaran ang hirarkiya; ang hirarkiya maga-alagad kaninyo tungod kay kini inyo man. Kamo ang mga pribiliheyadong dapit alang sa pagtagbo kang Kristo, ug dili ang gambalay sa templo. Ug ilabi na gayud kaninyo, mga gilapasang templo sa Ginoo: mga kabus, mga langyaw, kadtong mga nanagpuyo sa tawhanong kalisud ug mga biktima sa inhustisya ug pagdaugdaug. Kini nga panglantaw, rebolusyonaryo kaayo nga mahimong lahi ang pagsabot niini. Busa naghimo dayon si Pablo ug usa ka panagana: apan kamo iya ni Kristo, ug si Kristo iya sa Ginoo. Busa, dili kamo ang sentro; si Kristo ang inyong Sentro. Ang hirarkiya moalagad kaninyo, ug sa iyang pag-alagad kaninyo, iyang makaplagan ug maalagaran si Kristo nga anaa diha kaninyo! Tungod niini angay lamang nga magkahiusa kamo isip usa ka katilingbang Kristohanon!

Ebanghelyo: Mat 5,38-48

L: Ang Ginoo maanaa kaninyo.

K: *Maanaa usab kanimo.*

P: Ang pagbasa gikan sa Ebanghelyo ni San Mateo.

K: *Himayaon Ikaw, O Ginoo.*

P: (*Pagabasahon gikan sa Kasulatan*)

P: Ang Ebanghelyo sa Ginoo.

K: *Daygon Ikaw, O Cristo.*

Komentaryo sa Mat 5,38-48:

Ang subersyong gihimo ni Jesus batok sa batakang kinaiyang tawhanon iya karong gidala ngadto sa pinakalawom nga bahin. Batok sa ginaingon: mata sa mata, ngipon sa ngipon – kining karaang balaod sa pagpanimalos nga anaa usab makit-an isip usa ka hilig sa kasingkasing sa matag binuhat – gisugyot ni Jesus ang usa ka bag-ong alternatiba: ayaw itugyan ang imong pagtutol ngadto kaniya nga dautan. Ang balaod sa panimalos, sa pagkatinuod, makapa-korap sa tawhanong panaglambigitay ug sa relasyon uban sa Dios, tungod kay gihimong bangis ang tawo ug napugos siya sa pagdaut sa uban sama ra sa mga kadaut nga sa iyang natagamtam gikan sa dautan. Tungod niini, nahimo usab siyang mangil-ad, dili na tawo ug gipalayo sa iyang tinuod nga pagkatawo. Kining pangatarungan ni Jesus maghatud kanato sa pagsabot sa tinuod nga subersibong tinguha nga nagpaluyo niining subersyon sa kasarangang kinaiyang tawhanon ug sa kabangis nga gitugot sa balaod. Gugma! Ang matam-is nga subersiyon sa gugma! Ang gugma nga gisugyot sa Wali sa Bungtod mao ang gugmang radikal ug walay utlanan. Kining gugmaha walay gipaabot nga bayad, usa ka gugmang walay kondisyon nga nagsalamin sa hingpit nga gugma sa Amahan. Ang gugma sa Amahan hingpit kay iyang gitugot nga modan-ag ang silaw sa adlaw ug mangatagak ang ulan ngadto sa mga buotan ug sa mga dautan, ngadto sa silingan ug sa kaaway. Pinaagi sa pagsunod niining maong gugmaha – ipataas ang atong tawhanong paagi sa paghigugma ngadto sa diyosnong pamaagi sa paghigugma – matukod nato ang usa ka katilingban nga sa tinuoray matarung gayud, bag-o gikan sa iyang

gamut ug lintunganay nga malinawon. Kining gugmaha mopakatakus sa inang-ang nga proseso sa konbersiyon sa mata'g usa nga makasasala ug balaan usab; usa ka gugma kansang bunga sa konbersiyon mahitabo diha sa panagtagbo sa duha ka persona; usa ka gugma nga magbag-o sa kalibutan pinaagi sa pagdala sa mga anaa sa gawas ngari sa sulod, ug ang mga anaa sa sulid ngadto sa gawas, aron ilang masaluhan ang susamang kasaysayang tawhanon, susamang kinabuhi sa pakigbisog ug pagtoo; ug susamang tawhanong padulngan: ang Usa ug Bugtong nga Dios diha ni Jesus. Ang hingpit nga gugma sa Dios, nga nagdapit kanatong tanan, mao man gayud ang atong tinuod nga identidad, ug ang atong tinuoray ug katapusang padulngan!



*Subversive act
of love without
limits.*

Wali: Ang Simbahan sa Kabus, pinaagi sa mga Gagmayng Simbahanong Katilingban, gibalaan sa mga subersibong buhat sa gugma nga walay utlanan.

Sumadang Mensahe sa mga Pagbasa sa Dominggo	Ang Simbahan sa Kabus: Konkretong Hulagway sa kabus ug sa ilang kahimtang	Mga Puntos para sa Pamalandong/ Panawagan/ Hagit
Ang Simbahan sa Kabus, pinaagi sa mga Gagmayng Simbahanong Katilingban, gibalaan sa mga subersibong buhat sa gugma nga walay utlanan.	Unsang konkretong mga lakang ang nabuhat sa inyong Gagmayng Simbahanong Katilingban nga nakatabang aron mailhan ang mga sakit sa katilingban ug ang alternatibong Ginghamian sa Langit?	Unsay buot ipasabot sa gugmang walay kondisyon alang kanimo karon? Giunsa man pagkahimo niining gugmang walay utlanan nga tamis nga paagi sa subersiyon?

Padayag sa Pagtoo

P: Nagatoo ako...

K: ...Sa Dios ang Amahan ang makagagahum sa tanan, Magbubuhay sa langit ug yuta; nagatoo ako kang Jesukristo, ang Iyang bugtong Anak, atong Ginoo. Gipanamkon Siya sa lalang sa Espiritu Santo, (*Moyukbo ang tanan*) ug natawo gikan ni Maria nga Ulay. Nag-antos Siya sa sugo ni Poncio Pilato, gilansang sa krus, namatay ug gilubong. Miadto Siya sa mga nangamatay. Sa ikatulong adlaw nabanhaw Siya. Misaka Siya sa langit

ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasalyo sa mga sala, sa pagkabanhaw sa lawas, ug sa kinabuhing walay katapusan. Amen.

Mga Katilingbanong Pag-ampo

P: Mga hinigugma kong mga igsoon, dad-on nato karon sa Dios Amahan ang mga pag-ampo ug mga hangyo sa katawhan ug sa kalibutan. Ug motubag kita: Ginoo, tabangi kami sa paghigugma nga walay utlanan.

T: *Ginoo, tabangi kami sa paghigugma nga walay utlanan.*

L: Mag-ampo kita lang sa Simbahan: nga isip Simbahan sa Kabus sa tibook kalibutan, iya untang ipadayon ang pagsangyaw sa gugma sa Dios nga walay utlanan, ang atong Ginoo nga hinay masuko ug bahandianon sa kalooy ug kalomo. Mag-ampo kita sa Ginoo.

T: *Ginoo, tabangi kami sa paghigugma nga walay utlanan.*

L: Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing konsagrado ug sa tanang gitugyanan sa pag-amoma ug pagdumala sa Simbahan isip Katawhan sa Dios: nga ilang ipadayon ang pag-alagad sa katawhan uban sa halawom nga pag-amomang pastoral ug matinabangong pagsabot sa balaod. Mag-ampo kita sa Ginoo.

T: *Ginoo, tabangi kami sa paghigugma nga walay utlanan.*

L: Alang sa mga lideres sa kalibutan ug sa tanang gitugyanan sa pangagamhanan ug pagdumala sa mga butang sa kalibutan: nga ila untang dumalahon ang mga gobierno

ug katawhan dili sa pamaaging pinugos ug kusog sa balaod kondili uban sa hustisya ug kalooy. Mag-ampo kita sa Ginoo.

T: *Ginoo, tabangi kami sa paghigugma nga walay utlanan.*

L: Alang kanatong tanan nga nag-alagad sa Simbahan sa tibook kalibutan, nga moamot unta kita nga manggihatagon sa atong mga bahandi niining St. Peter Pence Sunday alang sa Simbahan, ilabi na sa mga kabus ug sa mga mahuyang. Mag-ampo kita sa Ginoo.

T: *Ginoo, tabangi kami sa paghigugma nga walay utlanan.*

L: Alang sa atong mga minahal sa kinabuhi nga milalin na: nga diha sa kapasayloan sa ilang mga sala, maila na unta ang pahulay nga dayon diha sa kasingkasing sa atong Ginoo ug Manluluwas, si Jesukristo. Mag-ampo kita sa Ginoo.

T: *Ginoo, tabangi kami sa paghigugma nga walay utlanan.*

L: Alang sa atong mga espesyal nga mga tinguha, sa kahilom sa atong tagsa-tagsa ka kasing-kasing, (*mohilum kadiyot*) Mag-ampo kita sa Ginoo.

T: *Ginoo, tabangi kami sa paghigugma nga walay utlanan.*

P: Ginoo ug among Dios, nangaliyopo kami kanimo: lig-ona kami diha sa diwa sa pagkamanggihatagon ug pag-inambitay, sa walay pag-ihap sa bili ug sa ginansya, aron ang tibook Simbahan, pinaagi sa mga buhat sa gugma sa Santo Papa alang sa tibook kalibutan, maalagaran unta sa imong gugma nga walay kinutuban . Kini among gipangayo pinaagi ni Kristo atong Ginoo.

T: Amen.

LITURHIYA NG EUKARISTIYA

Pag-ampo Alang sa Mga Halad

P: Sa among pagsaulog niining imong mga misteryo, O Ginoo, uban sa mga pagtamud nga angayan gayud kanimo, mapaubsanon kaming naghangyo kanimo, nga ang amo untang gihalad alang sa kabulahanan sa imong kahalangdon makahatag unta kanamo sa among kaluwasan. Pinaagi ni Kristo among Ginoo.

K: Amen.

Pag-ampo sa Eukaristiya

Prepasyo

P: Ang Ginoo maanaa kaninyo.

K: Maanaa usab kanimo.

P: Ibayaw ang inyong mga kasingkasing.

K: Amo nang gibayaw ngadto sa Ginoo.

P: Magpasalamat kita sa Ginoong atong Dios.

K: Angay ug matarong.

Rito sa Pangalawat

P: Karon mag-ampo kita sa Amahan, atong gamiton ang mga pulong nga gitudlo kanato sa atong Manunubos.

K: Amahan namo...

P: ‘Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron, tinabangan sa imong kalooy, mahalikay kami kanunay sa sala ug mahilayo sa tanang kasamok, samtang magapaabot kami nga malaumon sa pagbalik ni JesuCristo, among manunubos.

K: Kay imo man ang gingharian ug ang gahom, ug ang himaya hangtod sa kahangturan.

Kordero sa Dios

K: Kordero sa Dios nga nagawatang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, hatagi kami sa kalinaw.

Pangalawat

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

K: Ginoo, dili ako angay nga mokalawat kanimo, apan ipamulong lamang ug mamaayo ako.

Pag-ampo Human sa Pangalawat

P: Mag-ampo kita: Ihatag, naga-ampo kami, labawng makagagahum nga Dios, nga amo untang masinati ang mga bunga sa kaluwasan nga gisaad kanamo pinaagi niining mga misteryo. Pinaagi ni Kristo among Ginoo.

K: Amen.

Katapusang Bendisyon

P: Ang Ginoo maanaa kaninyo.

K: Maanaa usab kanimo.

P: Moduko kita ug atong dawaton ang bendisyon sa Ginoo: Hinaut nga ang kalinaw sa Ginoo nga labaw pa sa tanang pagsabot, magtipig sa inyong mga kasingkasing ug mga alimpatakan diha sa kahibalo ug gugma sa Dios, ug sa Iyang Anak, nga si Jesukristo atong Ginoo.

K: Amen.

P: Ug ang labawng makagagahum nga Dios manalangin unta kaninyo, ang Amahan ug Anak ug ang Espiritu Santo.

K: Amen.

P: Panglakaw kamo sa kalinaw, ug himaya ang Dios pinaagi sa inyong kinabuhi.

K: Salamat sa Dios. ■

**Ang Simbahan
sa Kabus,
pinaagi sa mga
Gagmayng
Simbahanong
Katilingban,
gibalaan
sa mga
subersibong
buhat sa
gugma nga
walay utlanan.**

Ubani si Fr. Ben Alforque sa Missionaries of the Sacred Heart sa iyang **GOSPEL BREAK**, hamubo apan makalingaw nga video mahitungad sa Ebanghelyo karong Dominggo. Bisitaha ang **gospelbreak.wordpress.com**. O pinagi sa inyong smartphone o tablet i-swipe kini nga QR



Nilimbag ng
COMMUNICATION FOUNDATION FOR ASIA
Visit: cfamagazines.wordpress.com

Katuwang ang
MISSIONARIES OF THE SACRED HEART
Visit: www.misacor.net